



Með vísan til fréttatilkynningar sem birt var á vef Seðlabanka Íslands 21. júní 2016, en þar er greint frá því, að í framhaldi af niðurstöðu gjaldeyrisútboðs þess sem auglýst var 25. maí 2016 þá byðist Seðlabanki Íslands til þess að kaupa aflandskrónueignir, sem ekki voru seldar í útboðinu, á útboðsgenginu 190 kr. fyrir hverja evru; eru hér á eftir settir fram skilmálar þeirra viðskipta:

1. Þeim viðskiptabönkum og verðbréfamiðstöðvum með innlánsreikning hjá Seðlabanka Íslands er boðið að hafa milligöngu um sölu í eigin nafni. Viðskiptin eru framkvæmd með vísan til útboðsins sem auglýst var hinn 25. maí 2016, með viðskiptadag 16. júní sl., hér eftir vísað til sem „útboðið“; og eru þau framkvæmd á grundvelli 1. mgr. 18. gr. og III. bráðabirgðaákvæðis laga nr. 36/2001 um Seðlabanka Íslands. Fjármagnshreyfingar í innlendum gjaldeyri, til tryggingar og/eða uppgjors viðskipta, og ráðstöfun á erlendum gjaldeyri við uppgjör viðskipta, eru undanþegnar takmörkunum laga nr. 87/1992, um gjaldeyrisráðgjöf, sbr. 13. gr. o. þeirra laga, sem og takmörkunum laga um meðferð krónueigna sem háðar eru sérstökum takmörkunum, nr. 37/2016.
2. Heildarverðmæti það í íslenskum krónum sem Seðlabankinn býðst til að kaupa er það heildarverðmæti aflandskrónueigna, sbr. lög um meðferð krónueigna sem háðar eru sérstökum takmörkunum, nr. 37/2016, sem ekki var selt í útboðinu. Seðlabankinn áskilur sér allan rétt til að ákvarða fjárhæðina endanlega.
3. Milligönguaðilar senda tilboð til Seðlabankans í gegnum Bloomberg fyrir kl. 10:00 mánudaginn 27. júní 2016 (samkvæmt staðartíma á Íslandi) þegar frestur til að skila inn tilboðum rennur út. Niðurstöður viðskiptanna verða birtar á heimasíðu Seðlabankans að afloknu uppgjöri útboðsins 29. júní 2016.
4. Verðið í viðskiptunum er 190 kr. á hverja evru.
5. Seðlabankinn áskilur sér rétt til að samþykkja öll tilboð sem berast, hafna þeim að hluta eða hafna þeim öllum.
6. Þeir milligönguaðilar sem hafa samið við Seðlabankann, og sem taldir verða upp á heimasíðu Seðlabankans, skulu safna tilboðum um sölu á aflandskrónueignum, sbr. 7. gr., og einnig 12. gr., þessara skilmála. Tilboð þeirra í millum skulu vera skuldbindandi tilboð með þeim fyrirvörum sem leiða af viðskiptunum. Milligönguaðilar skulu leggja fram samskonar tilboð til Seðlabankans í eigin nafni. Milligönguaðilum er heimilt að sameina þau tilboð frá viðskiptamönnum þar sem greiðslur þeirra eru sömu tegundar.
7. Milligönguaðilar skulu einungis safna þeim tilboðum þar sem framboðið fjármagn er aflandskrónueignir eins og þær eru skilgreindar skv. 1. tölul. 2. gr. laga um meðferð krónueigna sem háðar eru sérstökum takmörkunum, nr. 37/2016, og sem ekki voru seldar í útboðinu, og þá einungis þær sem eru í formi reiðufjár, skuldabréfa og víxla útgefinna af ríkissjóði Íslands eða með ábyrgð íslenska ríkisins. Tilboð sem byggja á öðru fjármagni en því skulu undanskilin, sbr. þó 12. gr. þessara skilmála.
8. Milligönguaðilar skulu, vegna allra tilboða sem þeir leggja fram til Seðlabankans, kanna og safna upplýsingum um raunverulegan eiganda og uppruna fjármagns að baki hverju tilboði, til samræmis við 9. gr. útboðsskilmála útboðsins.
9. Tilboð skulu að lágmarki innihalda upplýsingar um magn aflandskrónueignar sem boðið er til sölu og tegund aflandskrónueignar. Að öðru leyti skal hið sama og segir í 10. gr. útboðsskilmála útboðsins gilda um upplýsingar með tilboði, endurkaupaverð og lágmarksfjárhæð tilboða.
10. Við afhendingu aflandskrónueigna og gjaldeyris skal fara með sama hætti og mælt er fyrir um í 11. gr. útboðsskilmála útboðsins. Efni milligönguaðili ekki tilboð sitt áskilur Seðlabankinn sér rétt til að krefja milligönguaðila um fullar efndir og hæstu lögleyfðu dráttarvexti fyrir þann tíma sem greiðsla dregst; allt án frekari fyrirvara, og án ábyrgðar gagnvart viðskiptamanni milligönguaðilans.
11. Um efndir milligönguaðila gagnvart sínum viðskiptamönnum, og skiptingu fjármuna, skal fara með sama hætti og mælt er fyrir um í 12. gr. útboðsskilmála útboðsins.
12. Milligönguaðilum er einnig heimilt að safna þeim tilboðum þar sem framboðið fjármagn byggir á annars konar aflandskrónueignum en þeim sem eru í formi reiðufjár, skuldabréfa og víxla útgefinna af ríkissjóði Íslands eða með ábyrgð íslenska ríkisins. Ekki er heimilt að sameina slík tilboð. Um uppgjör og mat á markaðsvirði slíkra aflandskrónueigna, sem og undanþágur varðandi ráðstöfun slíkra eigna, skal gilda allt hið

sama og segir í 13. gr. útboðsskilmála útboðsins og leiðbeiningum útgefnum af Seðlabankanum vegna þess. Gögn til upplýsingar um markaðsverð skulu berast Seðlabankanum eigi síðar en fyrir lok dags 24. júní 2016.

13. Ef tilboð berst ekki til Seðlabankans vegna kerfisgalla eða einhverra annarra ástæðna þá firrir Seðlabankinn sig allri ábyrgð. Seðlabankinn hefur heimild til að fella niður viðskiptin í heild sinni vegna tæknilegra örðugleika. Milligönguaðilar geta óskað staðfestingar á móttöku tilboða hjá Markaðsviðskiptum og fjárstýringu Seðlabanka Íslands en óskir um slíkt hafa engin áhrif á það hvenær frestur til að skila inn tilboðum rennur út. Tilboð sem berast til Seðlabankans merkt ákveðnum skjám í Bloomberg eru bindandi og á ábyrgð þess aðila sem skráður er fyrir skjánum. Heimilt er að afturkalla eða breyta tilboði enda sé það gert í gegnum Bloomberg og það berist Seðlabankanum áður en frestur til að skila inn tilboðum rennur út kl. 10:00 á lokadegi viðskiptanna.
14. Skilmálar þessir gilda milli Seðlabankans og milligönguaðila sem gagnaðila Seðlabankans. Seðlabankinn ber ekki ábyrgð á neinum skuldbindingum milligönguaðila gagnvart viðskiptamanni hans vegna gjaldeyrisviðskipta þeirra á milli, og sem leiða af þátttöku milligönguaðila í viðskiptunum.
15. Þrátt fyrir það sem segir í þessum skilmálum getur milligönguaðili skilað almennt inn tilboðum á annan hátt en í gegnum Bloomberg enda sé sérstaklega samið um það við Seðlabankann.
16. Að öðru leyti en greinir í þessum skilmálum skal hið sama og segir í útboðsskilmálum útboðsins gilda, að breyttu breytanda, um viðskiptin.
17. Skilmálar þessir eru þýddir yfir á ensku en íslenski textinn gildir.